

四庫全書

集部

欽定四庫全書

集部

後周文紀卷

六五

詳校官中書

臣朱文翰

主事銜

臣徐以坤覆勘

總校官進士

臣楊懋珩

校對官原任典簿

臣郭祚熾

謄錄監生

臣劉能

欽定四庫全書

後周文紀卷五

明 梅鼎祚 編

庾信

周上柱國齊王憲神道碑

昔者軒皇受姓十有四人周室先封十有五國自爾承
基慕胄保姓受氏雖復千年一聖終是百世同宗故知
昔之東京既稱大漢再受今之周歷即是鄴都中興公
諱憲字毗賀突恒州武川人也晉太康之世據有黃龍

魏孝昌之初奄荒玄菟太祖以百二諸侯三分天下函
谷先登鴻溝大定功業如此人臣以終公含章天挺命
世誕生降太一之神下文昌之秀珠角擅竒山庭表德
儀範清冷風神軒舉聳動廊廟光華城闕未逾髻亂已
議論天下事人或曰是謂弱水一枝旁蔭數國長河一
直自然千里風颺欲遠光景將昇後魏二年封涪城縣
開國公時年五歲也虹蜺滿野是廢當塗之高驚驚鳴
岐實始惟新之命國家光宅受圖欽明秉厯大風初卷

長沙始封周元年進爵安城郡公食邑二千戶仍授使
持節驃騎大將軍開府儀同三司開府同於馬駿秩擬
六卿驃騎等於劉蒼位高三事宗子維城彼多慚色武
成二年授使持節大將軍都督益壽寧等二十四州諸
軍事益州刺史改封齊國公食邑萬戶公時年十有六
王武子以上將開府未滿立年荀中郎為十州都督才
踰弱冠方之於公已為老矣加復營丘負海齊桓公受
賑之城岷山導江漢武帝求仙之地自非名陵孤竹聲

振沉黎豈得南至穆陵西登積石幸無白虎之患寧待
黃龍之盟卽笱畏威微廬仰德生為立廟刻石頌功成
都有文翁之祀非謂生前漢陽有諸葛之碑止論身後
比之今日豈可同年而語哉保定四年與大司馬蜀國
公圍金墉城師臨洛浦則廣武營奔兵上邙山則河橋
路斷八川風俗五方名利鐵市銅街風飛塵起天和元
年徵還行雍州牧公以日月之明威神其政漆沮既從荆
岐即又少陽用事路不喘牛仲秋以殷民無驚水二年

拜大司馬仍理小冢宰營室殿軍器太監天官以邦國
為基是司六典夏官以兵戈為主專謀七德是以器械
填委既包吳漢之功宮殿崢嶸彌壯蕭何之法時以白
露涼風務閑農隙督兵三萬出自宜陽拔伏龍之城平
姚萇之壘馬陵削樹魏將路窮平陰聽烏齊師其遁天
子冢弟禮絕羣公仁義所往事資道德建德元年進爵
為王仍拜大冢宰姬旦封於曲阜不廢居中劉交國於
彭陽無妨常從豈直周召二南並居師傳晉鄭兩國俱

為鄉士而已哉匈奴突于武川燿火通于灞上公述職
巡御治兵朔方馬邑星飛龍城月動撓留犁之酒經畧
不前失煙支之山下馬而去東隣逆命反道敗德囚箕
子於塞庫罵文王於玉門天子將有孟津之師召公獨
議公報以誕應天命克成厥勲昔者秦昭起師于蜀直
問張儀晉武用兵于吳惟謀羊祜於是中軍無帥僉曰
有歸五年拜上柱國元戎東討給王鐵騎二萬先襲太
原斗建虜兵天離轉戰虎嘯風騰雲飛電掩林胡棗栗

詎得充飢晉陽荻蒿何能拒防又加王精兵六萬長圍
晉州然後六軍星陳萬騎雷動中權始及前茅已戰自
爾即為前鋒橫行入鄴觀彼車絙槐本馬驚旋淨積甲
高昆陽之城尸封塞富平之水莫不如彼建瓴同斯破
竹一朝指揮六合大定是用光昭下武翼亮中都足以
攄祖宗之宿憤解生民之怨黷方當待彼石閭部斯玉
鼓經緯天地光華日月既而赤烏夾日黃熊入寢實沈
無祀桑林不祭宣政元年六月二十八日薨春秋三十

有四季友之亡魯可知矣齊喪子雅姜其危哉公器宇
淹曠風神透遠璣鏡照林山河容納置樽待酌懸鍾聽
扣聲動天下光照四鄰武皇帝以介弟懿親特垂友愛
而密謀奇策加禮敬焉常謂左右曰孔子云自吾有回
門人日親其齊王之謂也用之作宰則萬方協和用之
撫軍則四表懾伏豈直臯陶為士國無不仁隨會為卿
民無羣盜愛翫書籍敦崇禮樂管絃入耳則溪谷俱調
文雅沿心則煙霞並韻養由百發落鴈吟猿應奉五行

綈緇縹帙雍容舉止抑揚談論當世以為楷模搢紳以
為軌範則少有壯志頗校兵書玄水降靈穀城授策飛
風長柳月角星眉莫不吟誦在心撰成于手所著兵法
凡有五卷六韜九法不用吳起舊書三令五申無勞孫
武先誠可謂有忠孝焉有壯武焉不自驕矜謙光下物
宋人獻玉不貪為寶伯成子高守仁為富不謂以信致
欺為善非樂天年不享嗚呼哀哉以某年月日葬于石
安縣洪瀆川之里原隰淒愴埋於盛德幾年丘陵搖落

蘊于才良永矣乃為銘曰

悠悠朔方遯矣窮陰山連鳥道地盡龜林重黎業大伯
翳功深胄其積德必有君臨太祖撥亂喪君有君功迴
地軸策動天文猶臨赤水尚復黃雲諸侯八百天下三
分公之挺生寔惟天假翠微神降文昌星下照于四國
充于兩社舟楫江河棟梁華夏水涌詞鋒風飛文雅純
深之性地極天經忠貞之道事感百靈君親惟一臣子
惟寧忠泉出井孝笋生庭乃宰天官為國之輔是居上

將為天之柱乃聖乃神惟文惟武策高開闢威移雲雨

九宮神略三術謨明天離轉陣月德迴兵黎陽水駭官

渡山驚冀州既載東京底平溟波欲運弱木將危中鋒

岳斷半海鵬垂鳳沉丹穴龍亡黑陂臨溜廢市東武山

移千齡萬古英聲在斯

大漢一作炎漢世一作始天下事等句一作天下衣裘裳先能

問曰是謂若木一枝益壽寧周書作益寧巴瀘仍理一作釐星飛一作迴留聲出漢書匈奴傳一作蒲桃非黠

疑作讎器一作牆禮樂一作典九法一作地鳥道一作鳥羽喪君有君一作有功實君非臣疑作神充于兩社

一作問于兩社地一作義

周太子少保步陸逞神道碑

公諱逞字季明本姓陸吳郡人也君子至止既紹虞賓
鳳凰于飛實興齊國南越使者解漢帝之衣西陵將軍
覆吳王之蓋曾祖載為宋王司馬留鎮關中赫連之亂
仗劍魏室黃河叅陵或亡追路烏江艤船更無歸迹今
為河南洛陽人也高祖冠軍將軍榮州刺史吳人有降
附者悉領為別軍自是官師擁鐸更為吳越之兵君子
習流別有樓船之陣父政驃騎大將軍儀同三司恒州

刺史中都獻公太祖扶危濟傾經綸夷阻報君之恥遠
襲平原以高平霸業所基委命留事關中饋食非直榮
陽之師河內供軍豈但淇園之竹公秉照晉之靈降明
神之德猛虎振檻七年不驚羝羊觸藩九齡能對諸兄
以公先君愛子稱之曰仁推而襲封雖復季末大成之
心守節疑有闕誤既遭燠穴翻從歷紐太祖初封咸谷始合
諸侯以公詞令叅謀機密故得戎政克宣師言無漏賜
姓步陸孤氏委鹿輅而論都入鴻門而舞劒方之吹律

綽有餘榮出身羽林監輕車將軍除尚書右丞官聯會

計務殷平準水衡貫朽常平粟紅授使持節車騎大將

軍儀同三司增邑千戶尋遷駕部中大夫領兵部中大

夫領蕃部

疑誤

東京鼎寶先加鄧騭之勳西晉官人多用

山濤之啟豈若五王登朝必司賓主之禮六龍銜轡取

定鸞和之節御正以官觸父名不拜會稽有王會之名

其子不為太守博陵有王沉之封其兒不為刺史遷驃

騎大將軍開府入掌納言治司宗伯又為軍司馬職居

常伯勤問於南宮位管王言連官於北斗豈止郊天祀
地龍門嶰谷之聲贊鼓頌旗白露涼風之月闇夜有人
餉羅數十匹公閉門不受行人干觸具以聞奏朝野稱
之太尉楊震直推故吏之金涼州張奐高揖羌人之馬
清畏人知我無慙德齊國通和封人受使以公有出境
之才見命張旌之禮既珠盤歆血定楚國之連名匕首
登壇反齊人之侵地是謂使乎固稱光國久三輔公侯
五陵鐘鼎銅街柳市塵起風飛乃授京兆尹增邑通前

一千六百戶餘官如故上林息蘭池盜靜不學王陽
平生鑄金之術未同張敞終日章臺之遊家僮暮行還
得遺錢于道并白絕十匹公訪得其主即以還之見金
於路指以示人得錢於道留持掛樹方之今日異代同
風俄遷司會治小司馬重摠六軍再操八柄考績入於
歲成論功書之年表尋授都督宜州諸軍事宜州刺史露
冕觀風停車待雨百城解印憚朱穆之威千里相迎愛王
基之德曾未朞月被敕追還眷眷吏民不無河內之請

依依故老實念黎陽之別少陽養德前星守器尊師讓
齒必俟賢能乃授太子太保方之劉寔道高於大邦譬
以山濤榮深於小輦本有消渴之疾常餌金石自理舊
疾微增奄捐館舍茂陵之下不留封禪之書校尉之營
惟餘服食之器嗚呼哀哉春秋四十有七建德二年五
月十一日也天子以大臣之喪躬輟聽訟東朝以師傳
之尊親臨攢祭詔贈某官謚某公禮也以今三年正月
十日葬於京兆之高陽原夫人郁久閭西遇王姬愛敬

肅恭言容令淑有聞箴盥無廢絃綆爰在盛年先從大
夜令節婦開墳松栢已拱季孫成寢丘陵始同况復圖
畫賢妃方在甘泉之室瘞埋才子即用高陽之原公儀
表外明風神內照器量深沉階基不測事君惟忠事親
惟孝言為世範行為士則留連墳素怙悵文詞霜府錄
于尚書天官摠于司會出入匡贊常帶數職身具六龜
腰恒四綬陳平密謀既非天子所見荀彧上策又非諸
侯所聞其為郡也惟取赤土封書其為州也唯以青鹽

換粟留家則千樹無資遺子則一經而已嫡子操至性
過禮純孝不遺墳前之樹染淚者先枯庭際之禽聞悲
者則下銘曰

山連日觀水枕滇機富春沙起開陽柱飛大夫屈節將
軍振威南越受吏西陵解圍昔我烈祖垂翅秦中白馬
無路烏江不通笛吟鄉里琴哀土風營州恒州擁旄世
載壯節旃矜人雄關塞直河穿趙平雲臨代生為立功
沒為留愛降茲岳瀆誕此貞明祥符雲氣慶合星精宮

帷定策殿柱書名忠泉暗漏孝笋寒生世屬殷周時逢
楚漢天下三分鴻溝一半以我明略來叅匡贊日乃再
中天成兩旦遞叅三事歷副六卿天師先宅地載謨明
春官定禮夏官治兵讖言默識溫樹無名謙恭周密言
行無乖忠公兕殪陰德地埋軍國紛總部領填堦馬不
入廐金不入懷具瞻惟德高山惟仰甲觀初登龍樓初
上東國桓榮西京疎廣年齡俄頃風電相推銘旌兩沒
池柳雙迴煒煒亂子御疚銜哀身彰野火心懼天雷日

月其除榮終哀始馬歸司隸書還太史歷對天星墳連
地市山勢接飛松形蓋起德音無絕平原忽矣

妃一作姻
天作一作

天司堦
一作階

周大將軍崔說神道碑

說周書
作說

公諱說字某博陵郡安平縣人也昔者華陽之野降龍
首之神烈山之都啓龜文之繇匡周則盟津有會佐夏
則龍門始鑿西遊則起家秦相東入則載世齊卿備乎
史籍可得言矣祖辨中軍將軍定州刺史父楷鎮北將

軍司馬烈侯並厲風霜俱張鋒穎邸史疊迹官曹凜然
是謂鮑恢都官百城振懼葛豐握節京師斂手公特稟
英靈偏鍾山岳雄姿俊茂眉目疎朗觀虎于檻髻髮不
驚稱象於船勝衣能對至于拉虎羈雄摧斑碎掌忘歸
繁弱落鴈吟猿故得氣蓋關中威申河外解褐領軍府
錄事轉諮議叅軍時當塗失御政在權門始論函谷之
兵即起韓陵之戰太師賀拔勝作牧西荆公為假節冠
軍將軍防城都督及南陽失守卷甲奔梁樂毅羈旅猶

思燕路陳軫愴悽終戀秦聲幸值和鄰言歸舊國授衛
將軍都督封安昌縣開國子食邑三百戶弘農尅復沙
苑摧鋒進爵為侯增邑并前一千一百戶信珪則更受
司勳穀璧則還輸典瑞鐵馬有河橋之戰戈船有汾水
之兵除京兆太守移民下邑未學邊韶走馬章臺不同
張敞遷帥都督持節撫軍通直散騎常侍大都督尋遷
使持節車騎大將軍儀同三司都官尚書定州大中正
五曹奏事有朱穆之忠九品論人見楊喬之直改封安

國縣侯益邑合前一千四百戶賜姓宇文改名為說漢
王改婁敬之族事重論都魏后變程昱之名思深捧日
遷車騎大將軍開府儀同三司加侍中竇憲連官單于
之寶鼎可致張寬固位渭橋之流星可識司木七工既
掌丘陵之賦司會六典乃均邦政之才居官得人於斯
為盛進爵為公改封萬年縣通前二千四百戶除隴州
刺史都督隴州諸軍事隴坻路遙秦川望遠鄧仲華之
不去馬文淵之願歸尋除涼州刺史摠督河西甘瓜諸

軍事地似伏龍城如飛鳥燉煌實錄宛在胷襟玉門亭
障無勞圖畫有馬如羊不以入廐有金如粟不以入懷
柱國齊王今上之介弟龔行薄伐問罪河陽以公為行
軍長史叅謀帷幄中軍之司既舉魏絳上卿之佐實用
荀林以公方之差無慙德除使持節大將軍大都督崇
德安義建忠九曲安樂三泉伏流周張平泉固安蠻通
谷凡十三防禦熊和中三州黃蘆起谷王晏供趨牽羊
溫狐交河大嶺避雨木柵寺一十戍諸軍崇德防主宜

陽上地更有秦兵熊耳山前還逢積伏用是連營函谷
獵騎黎陽威振兩河名陵三晉改封安平縣公淮陰一
國韓信之故人戶牖萬家陳平之鄉里公此衣錦足為
連類建德四年正月十日薨于長安之永貴里私第春
秋六十有四詔贈敷延丹綏恒五州諸軍事數州刺史
謚曰莊公禮也即以其年二月二十四日葬于京兆平
原鄉之吉遷里北陵追遠大司馬有賜綬之恩西京贈
行冠軍侯有詔葬之禮嗚呼哀哉世子儀同行生事以

禮死葬以禮愛親有王祥之孝同氣有姜肱之睦百行之本於斯備焉况復松檟深沉既封青石之墓丘陵標榜須勒黃金之碑乃為銘曰

華陽之神厲山之祖鳳野匡周龍門佐禹日浴溟池山浮海浦甫穆霸國營丘樂土肩斯宗邑承此壤王移封東武就君安陽中軍節目鎮北鋒芒商飈獵草電火驅霜公之輪奐繼體貞幹儀表丘墟風神墻岬孝有至德忠能匡贊不廢橫琴無妨欹案既班三事又貳六官衛

青受詔韓信登壇長城馬窟廣武兵欄軍吏無犯營民
不寒乃用六謀乃論三策城壘向背星辰主客劍起沉
犀弓開伏石楚后讓盟秦君還璧百齡危脆千仞摧藏
諸侯地裂邊將星亡輕車騎士玄甲黃腸社如齊地廟
似桐鄉銘功贊德碑闕相望

中軍將軍魏書北史並作
安南將軍鎮北將軍司馬

魏書周書北史並作驃騎將軍開府儀同三司羈熊一
作桺熊還車騎周書作遠驃騎慙德下周書有軍還二
字數周書作
郇恒作長

周大將軍司馬裔神道碑

公諱喬字遵脣河內溫人也昔顓頊之命始則南正司
天重黎之後又以羲和掌歷夏陽適晉得隨會而同奔
東海避秦與毛公而俱隱其後金行受命玉笥南遷帝
系極于東圖中朝至于江表曾祖楚之晉太傅錄尚書
揚州牧會稽文孝王之次子元顯之幼弟也元顯見害
之後桓玄篡逆之初爰自髻鬣客身屠釣河內道左抱
劍長號代郡城前慟悲靈祭江淮志節之士汝潁風塵
之客感激一言咸多依附既而雲生伏龜星出鯨魚太

白經天蚩尤映野公乃收合餘燼泣血登陴臨武牢之
關據成臯之坂擁衆萬家歸於魏室魏明元皇帝遙授
平南大將軍荊州刺史襲封瑯琊郡王尚河内公主命
王承制從賓國之儀于時宋兵憑陵旗鼓侵逼虎牢不
封金墉無援魏太武皇帝授王使持節侍中安南大將
軍開府儀同三司給前後部鼓吹元戎啓行志雪冤恥
登壇慷慨三軍掩泣黃河漕粟已出石門仕馬連旗將
臨野坂既而雲中柝起代郡烽然反旆南轅途窮北畧

贈征西大將軍都督梁益秦寧荆兗青豫郢洛十州諸
軍事揚州牧司徒謚貞王祖金龍封瑯琊鎮西大將軍
儀同三司吏部尚書贈司空謚康王父悅鎮南將軍豫
州刺史漁陽莊侯以荆河刺舉時值亂離疊起蕭牆遂
終非命公遺腹載誕流離寇逆複壁襁負深山擁樹程
嬰之匿趙武從役家臣王成之藏李燮為傭酒市遭太
夫人憂苦草墳塋以終灰燼形骸毀瘠逾于喪禮年十
有五始幹家事楹前鑿柱即取遺書石上開松仍求故

劍出身司徒府叅軍除中堅將軍員外散騎常侍值魏氏多難所在烽起孟津以北無復封畿嵩山已南即為鋒鏑公建議修武立柵溫城函谷西封河橋北斷長亭籍馬並入武城百里祖車咸輸溫縣太祖文帝締構關都經綸夷阻招携以禮懷遠以德馬文淵之擇主去隴坻而歸身竇周公之入朝在河西而奉詔大統七年蒙授平東將軍北徐州刺史十年河內故義四千餘家願立忠誠須公衣錦乃授使持節領河內太守加前將軍

懷州拓境兩鎮奔波柳泉轉戰三城授首十三年太祖
召山東諸立義之將能率衆入關者有加重賞公率先
而至領戶千室即以為封固辭不受其菽粟之賜或以
指困馬牛之賞將同量谷朝廷以華陽西極漢水東流
歎孟達之奔兵怪劉封之失策魏前元年移鎮漢中除
白馬城主領華陽郡守者昔稱導漾今聞上瀦烟沉冰
井雨歇雲門其年授大都督加散騎常侍柱國蜀國公
開金牛之道通牧馬之關公卷甲北塞懸軍束馬遂得

策預葭萌勲叅綿竹封龍門縣開國子蒲州刺史仍領
新州尋授使持節車騎大將軍儀同三司大中正隆周
授圖天保大定以公才望仍為舊臣遂乃義深追遠恩
隆繼絕即改封瑯琊縣公邑五百戶仍遷驃騎大將軍
開府儀同三司都督巴州諸軍事巴州刺史武成二年
被敕赴援信州魚復道阻屢却岑彭荆門水急幾沉吳
漢公乃月峽先登瞿塘直上天子以公操履忠勤儀刑
亮直乃徵為大御伯尋轉大御正邑一千一百戶樞機

近侍出納絲言所謂多識舊章殿中無雙者矣四年大將軍東討公所領義衆先守枳關授都督懷州諸軍事懷州刺史偃師張幕河陽牧馬雖接戰于富平已連營于官渡五年詔追還拜始州刺史更封信州賊山彰尋寶渝恃險峽路五尺絙釣纜通縣水三門橋飛濟渡既而風行草偃谷靜山空前後平十一城獲九千餘口馬歸平樂金輸水衡天保二年除信州刺史都督信州諸軍事朝發白帝暮宿江陵氣振巴丘之兵威警建平之

成五年遷潼州刺史益州柱國公降帝子之重鎮天井之星延閣擬於叢臺岷山方於代郡公仰稟雄謨叅謀遠略故得身預舞陽之功位極長平之寵六年授使持節大將軍大都督西寧州諸軍事西寧州刺史方欲關沫若微犂犗見夜郎之侯習昆彌之戰而飛鳶墮水馬援去而無歸金馬騁光王褒行而不反嗚呼哀哉七年正月十日薨春秋六十有五詔贈使持節大將軍懷邵汾晉四州諸軍事懷州刺史夫人襄城公主魏獻帝之

曾孫趙穆王之季女王姬肅恭榆翟禮典四教競莊三星
令淑有隆光裕之賢足表平陽之盛生則從夫以秩死
則同穴以禮建德元年八月十二日合葬于武功三時
原大夫墓樹以栢諸侯墳高于雉于嗟滕公來居此里
詔謚定公禮也公資忠履孝蘊義懷仁直幹千尋澄波
萬頃逢蒙射法力牧兵書星辰高下之占風雨逢迎之
氣故得師出以律天幸將軍者也至於官曹案牘未嘗
煩壅戎馬交馳不妨餘裕足使四岳彌峻三台更明在

朝四十一年身經一百餘戰凡任四郡歷八州未嘗以
貨殖經懷去如始至渭南千畝之竹更懼盈滿池陽二
頃之田常思止足身歿之日家無餘財素車白馬狹室
崎嶇黃腸玄甲堦庭仄陋有詔冬官為營寢室朱邑祭
酹無所漢后是以賜金陳表妻子露立吳王為之開館
嗚呼哀哉世子侃孝家忠國揚名顯親是以勒此豐碑
懼從陵谷殖之松栢不忍凋枯銘曰

欽若厯象平秩寅賓少梁奔華地入咸秦族夷興馬書

窮獲麟玉鏡云始金行乃構象浦通闕龍沙開候上糝
石起河陽水閫五馬南浮三星東宿太傳作牧庵有江
沱司徒避亂承制荆河南勞推轂猶思枕戈龍媒被野
蒼兕凌波莊侯季年禍機相接誕公遺嗣崎嶇懷挾山
竄趙武家藏李燮五負道阻燕丹路遙南奔楚塞北避
秦橋水流登隴寒風度遼有功都護則重嫖姚懷書上
馬習禮從戎陣圖六甲兵占八風藏松寶劍射柳琬弓
推誠賈復屈節廉公八翼頻飛六條亟秉勇此仁義行

茲寬猛持印山開沉黎盜靜取甲無丘均田不井懋功
賜爵上將賞官軍中受詔塞外登壇方屠叅合更鑿臯
蘭渝川毒水焚道灾氛地亡都尉灘悲使君谷寒無日
山空足雲北風吹旄秋霖泣軍遣奠雙設銘旌兩布沁
水同墳平陽合墓悲哀嗣子攀號靡訴慟甚風枝悲深
霜路自此何世從斯幾年麒麟欲鬪華表中燃地形樓
起松心蓋圓茫茫丘壠代代英賢

莊侯周書北史並作
子十三並作十五號

一作兢循
一作條

周柱國大將軍拓拔儉神道碑

蓋聞放勛立而羲和昇重華登而元凱用思皇多士既
成西伯之功俊德克明乃定南巢之伐是知惟賢非后
弗食惟后非賢弗乂若夫君臣一德啟心沃心見之昌
寧文公矣公諱儉字慶明恒州高陸人也北岳天孫之
星燕河帝子之國故多奇節甚茂華風高闕圖南二王
齊軫長城拔本十族分源高祖太尉北平王光輔五君
允釐百揆恒衛既從淮沂其乂祖豹龍驤將軍恒州刺

史常山刺舉非無取代之符龍驤搃戎或似平吳之號
父馘年止弱冠榮終解印公以五常蘊智六氣資德乘
天則策馬秉靈降神則牽狼應象直心於物水火恬然
無負于天雷霆不懼富貴自取豈資唐舉之言聲名有
聞無勞李膺之識年十八解褐貢外散騎侍郎尋授輕
車將軍羽林監太祖文皇帝駕馭天綱苞羅英傑選公
才德光佐中書諸葛亮之西歸玉壘成三分之業管夷
吾之入仕葵丘有一匡之功天水黠羌漁陽羣盜乃遷

秦州刺史長史防城大都督封信都縣開國伯三年滑
州蟻聚保鄣沉命靡旗亂轍乘冰渡河丞相大行臺授
假節撫軍行滑州刺史大統元年授持節西夏州刺史
加散騎常侍郅支抱馬如聞耿秉之戰單于願識似畏
王商之威五年遷使持節鎮東將軍都督東北三夏州
諸軍事西夏州刺史增邑千戶改伯為公既而江漢遼
遠車書寂寞蜀主的顱未出檀溪之水秦王飛雉猶向
南陽之城六年以公為使持節都督三荆三襄南雍平

信江隨郢浙一十二州諸軍事荊州刺史東南道行臺
僕射楚城鄰境實有讓田吳人對營無妨贈藥部內屬
城為人所訟公遂集文武肉袒自罰兄弟不讓延壽責
躬吏民有過翁歸引咎天子異之璽書勞問贈賄加幣
王人接踵大丞相書云此之美事耳目之所未經歎尚
無極故遣專使公善於撫馭長於接引山藪無棄苞苴
不行示人赤心與人顏色盜不敢發民不忍欺至是將
校耆老於州城之南起清德之樓勒賢臣之頌杜鎮南

之作牧當世樹碑竇車騎之臨戎生年刻石方之今日
彼獨何人于時戶口日增荒萊畢墾華實紛敷黔黎茂
豫但恐袞職有闕待公而補鼎鼐未和須公而正是以
漢民陰望荆南杞梓並皆上書詣闕連名乞留河內之
借寇恂更慙謁帝交州之請士燮還著上表九年授車
騎大將軍儀同三司十二年除大行臺尚書仍為大丞
相司馬以公識度嚴明志節清儉遂改公名儉字慶明
非關書月詎待看碑幸得千畝不同二山無廢十三年

加開府餘官如故十四年除尚書右僕射加侍中進駟
騎大將軍居上星執法在文昌之位以公才望兼而有
之十五年更除東南道行臺僕射都督十五州諸軍事
行荊州事十六年大丞相總十六軍赴清河洛公又中
分麾下叅謀幃幄高選霸僚公為長史其年加都督南
道三十六州諸軍事餘官如故南陽文學更遇王基章
華袞衣還迎郭賀昔日伐蜀之謀張儀與秦昭計合平
吳之利羊祜與晉武意同太祖始定成都即有江陵之

志公密獻其策懸符深旨糧運久積梯衝立備一戰而
舉鄢郢再戰而燒夷陵遂得席卷三荆此又公之勲也
詔賞奴婢三百口太祖與公書云由公立計果如所謀
令公作鎮江陵以安蜀地後魏二年改武川昌寧縣開
國公歷陽居民非惟景丹之封曲逆戶口豈但陳平之
國其年授大將軍太和中曹真于府戶受冊元封之
末衛青于軍中即拜公之此比綽有餘榮詔曰吳人未
復須助謀謨今使梁王兵馬受公節度三年加都督東

南道五十二州諸軍事增邑萬戶維周革命光宅欽明
作貳天官允諧邦治元年授小冢宰保定二年治蒲州
刺史檢校六防諸軍事四年治襄州仍授柱國大將軍
餘官如故秩登四岳階平六府豈不功重昭陽名高蔡
賜控馭五十州風行數千里拔園葵而去織婦無三惑
而絕四知一室之中未免虛白日膳之資三杯而已詔
乃賜繒綵一千段粟麥二千斛天和元年陝州刺史都
督八州二十防諸軍事解荊州總管餘悉如故路出王

官城臨河曲成清陝右高視棠陰部領宴繁晦明為疾
天和四年謝病故京薨于私第春秋七十有八鑾蹕降
臨軒懸徹樂九旒龍旆之錫三河騎士之送詔贈太保
涼夏靈銀長原河鄴甘瓜十州諸軍事涼州刺史謚曰
文公狀貌丘墟風神磊落玉山秀立喬松直上烟霞之
涯際莫尋江海之波瀾不測少遭荼苦在山服終攀栢
樹枯侵松獸死盡忠事國竭力從政其門如市其心若
水奇策密謀百僚仰止忠貞亮直明主敬焉至如風后

陰陽之占力牧星辰之度魏公子之兵書李將軍之射
法莫不成誦在心取為時用居常服說或以布被松牀
盤案之間不過桑杯石鼎遺令山陵一無所用公私贈
襚竝不得受止依太祖陵側無忘事君墩等兄弟並至
性善居喪號墓墳塋奉遵遺訓是以衛青之塚仍陪漢
武之陵管仲之墳即接齊桓之墓天和六年天子以四
海未寧三方鼎峙有懷將帥之志言念封疆之臣既畫
雲臺乃題麟閣更贈公為鄆國公邑五千戶追崇列辟

事極神魂再改銘旌恩隆封墓公在民留愛身後見思
吉日良辰郊祠野祭儀同趙超等六百九十七人表求
立廟陳請象魏有詔許焉桂棟杏梁綠墀青瑣按歌會
舞鳳蓋霓裳南浦送而行雲東風颺而零雨是知漢陽
郡前非徒武侯之廟臨淄城下豈獨樂公之社嗚呼哀
哉乃為銘曰

道鍾屯剝世屬雲雷地軸左轉天闕北開客車周室繫
馬秦臺乃齊七政爰荅三才烈祖燮諧九龔梁棟取才

逢獵求賢入夢匡贊官雲謀猷紀

非作絕

鳳律定公族珪

分職貢乃惟嗣德實秉英靈身圖斗宿面繞樞星青衿
敬業童子離經信陵虛右干木分庭忠孝純深樞機周
密孔光不言曹參勿失溫席扇枕承顏悅膝凍浦魚驚
寒林笋出肅肅風政沉沉器局直似貞筠溫如瑞玉清
不置水明非舉燭馬願如羊金須似粟上將克昇元戎
既序夏陽三捷夷陵一舉憑軾下齊陵江入楚鼎反歷
室鐘歸大呂六卿咸事天官是司二南作伯棠陰實治

清風有頌綠竹聞詩贈行之冊超然帝師昔侍蘭苑今
陪杏林死生契闊無違一心風雲積慘山陣連陰陵田
野寂松逕寒深夏嬰之隴喬玄之墓馬見千年車迴三
步左無長樂前非武庫直望高碑增悲行路

後周文紀卷五

欽定四庫全書

後周文紀卷六

明 梅鼎祚 編

庾信 三

周柱國大將軍紇干弘神道碑

公諱弘字廣略原州長城縣人也本姓田氏虞賓在位
基於揖讓之風鳳凰于飛紹於親賢之國論其繼世之
功則狄城有廟序其移家之始則長陵有碑况復高廟
上書小車而對漢王聊城祭烏長岳疑而驅燕將公以

胎教之月歲德在寅載誕之辰星精出昴是以月中生
樹童子知言水上浮瓜青衿不戲而受書黃石意在王
者之圖揮劍白猿心存霸國之用魏永安中任子都督
翻原州城受隴西王節度于時洛邑亂離當途危逼禮
樂征伐不出於天子舉賢誅暴實在於強臣太祖文皇
帝始創霸功初勤王室秣馬蒐乘誓衆太原公仗劍轅
門粗謀當世隨何遠至實釋漢帝之憂許攸作攸非夜來
即定曹王之業永熙中初迎魏武帝入關封鶉陰縣開

國子邑五百戶太祖以自着鐵甲賜公云天下若定還
將此甲示寡人白水良劒罷朝而贈陳寵青驪善馬迴
軍而賜李忠並經輿服足為連類大統三年轉帥都督
進爵為公十四年授使持節都督原州諸軍事原州刺
史仙人重返更入桂陽之城龍種復歸還尋白沙之路
公此衣錦鄉里榮之侍從太祖戰河橋復弘農解華山
圍平沙苑陣必有元勲常蒙別賞太祖在同州文武並
集號令云人人如紇干弘盡心天下豈不早定即授車

騎大將軍儀同三司前魏元年轉驃騎大將軍開府祈
連未遠即受冠軍之侯沙幕未開元置長平之府梁信
州刺史蕭韶寧州刺史譙淹等猶處永安稱兵漁陽公
受命中軍迅流下瀨遂得朝發白帝暮宿江陵猿嘯不
驚鷄鳴即定西平反羌本有漁陽之勇鳳州叛氏又習
仇池之氣公推鋒直上白刃交前萬死一決凶徒多潰
身被一百餘箭傷肉破骨者九瘡馬被十槊露布申上
朝廷壯焉葛屨糾糾魏有去舊之歌零露瀼瀼周受惟

新之命乃進爵封鴈門郡公食邑通前二千七百戶保
定元年授使持節都督岷州諸軍事岷州刺史隴頭流
水延望秦關川上峨眉猶通蜀道公不發私書不燃官
燭獸則相負渡江蟲則相銜出境四年拜大將軍餘官
如故衛青受詔未入玉門之關竇憲當官猶在燕山之
下公之此授差無慙德渾王叛換梗我西疆巖羌首竄
藩籬携貳公受服於社偏師遠襲揚旂龍涸繫馬甘松
二十五王靡旗亂轍七十六柵鶉奔雉竄既蒙用命之

賞乃奉旋師之樂天和二年被使南征帶甲百萬舳舻千里江源水起海若乘流船官之城登巢懸甕吳兵習流長驅戰艦風灰箭火倏忽凌城公以白羽麾軍朱絲度水七十餘日始得解衣朝廷以晉尅夏陽先通滅虢之政秦開武遂始問吞韓之謀是以馳傳追公以為仁壽城主齊將段孝先斛律明月出軍定隴以為宜陽之援公背洛水而面熊山陣中軍而疎行首乘機一戰宜陽衝壁增封五百戶進柱國大將軍司勳之冊也建德

元年拜大司空二年遷少保姬朝三列少保為前疑炎
正五官冬官為北頻煩寵命是謂賢能三年授使持節
都督襄郢昌豐唐蔡六州諸軍事襄州刺史江漢之間
不驚鷄犬樊襄之下更多冠蓋既而三湘遼遠時遭鵬
入五溪卑濕或見鳶飛舊疾增加薨于州鎮天子晝凌
烟之閣言念舊臣出平樂之宮實思賢傳有詔贈某官
禮也即以四年四月二十五日歸葬于原州高平之鎮
山屬國玄甲輕車介士一依霍騾騎之禮衛將軍之葬

嗚呼盛哉公入士四十五年身經一百六戰通中陷刃
疾甚曹參刮骨傳藥事多關羽而風神果勇儀表沉雄
事親無隱無犯學不傳經略觀書籍兵無師古自得縱
橫青烏甲乙之占白馬星辰之變九宮推步三門伏起
天弧射法太乙營圖並皆成誦在心若指諸掌虜青犢
之兵甚有秘計燒烏巢之米本無遺策西零賊退屈指
可知南郡兵迴插標而待常願執金鼓而問吳王橫瑯
戈而返齊地有志不就忠貞死焉世子恭等孝惟純深

居喪過禮對其苦寢則梓樹寒生聞其悲泣則巢禽夜
下嗚呼哀哉乃為銘曰

天齊水合日觀山連兵強東楚地遠西燕五卿咸正三
王並賢靈龍更起燧象還燃自天之德乃祖乃父維岳
降神生申及甫北門梁棟西州雲雨勇讐燕城名題漢
柱公始青衿風神世載猛獸不驚家禽能對劍學千門
書觀六代有竭忠貞無違敬愛乃數軍實乃握兵謀澆
沙成壘聚石成圖風雲順逆營陣孤虛靈雨鉦鳴燿火

飛狐淮陰受冊車騎登壇公為上將有此同官下江燒
楚上地吞韓推功玉案定策珠盤天有三階公承其命
國有六卿公從其政台曜偕輝槐庭重映匡贊七德謨
猷八柄腹滿精神心開明鏡伏波受脤樓船推轂東道
未從南征不復飲丹有井澆泉無菊功存柳林志在楠
木移茵返葵提柩山行芻靈隴水哀挽長城山如北邙
樹似東平松門石起碑字金生眇眇山河甕甕肩子泣
血徒步奔波千里孝水先枯悲雲即起世數存沒哀榮

終始

周柱國大將軍大都督同州刺史余綿永神道

碑

姓氏書後
為綿氏

公諱永字永賓東燕遼東郡石城縣零泉里人也本姓
段昔者昌意陵居初分若水之姓共叔出奔始有京城
之族西河居士蕃魏而却秦北岳將軍威夷而奉晉其
後居于北代則先封遼水備乎史籍可略而言祖援鎮
西將軍馮翊太守父儒平東將軍持節恒燕朔三州諸

軍事恒州刺史公年裁弱冠卽值亂離驅馳關塞之間
早有縱橫之志軍陣方圓無勞聚米山川形勢不待披
圖魏正光五年入仕解褐殿中將軍孝昌三年加龍驤
將軍永平二年授平東將軍都督中埏建義勲謀是先
蒙賞倉泉縣開國男食邑一百戶其年淮淝侵軼南鄙
徵公兵受賑偏師一月三捷昔張遼奄至闕封沃陽縣
開國伯食邑五百戶進爵為侯永熙元年授使持節車
騎大將軍左光祿魏武帝特召入仕閣內大都督馬武

小心侍蕭王于卧内典韋忠壯陪魏后于宮中于時賊
帥元伯破掠城市西自潼函東綿鞏洛京畿大都督請
士馬五千公曰此賊無他策尋為鳥散止請五百騎應手
生擒朝廷賞其謀策百姓喜其除害既而喪亂弘多生
民板蕩乘輿西幸宗社北遷公妙識玄象深知歷數乃
與昆弟謀為自全斬西中郎將送首闕内蒙賞平昌縣
開國子食邑三百户大統元年授使持節都督北徐州
刺史平竇軍復弘農戰沙苑河橋公並預先登身當鋒

首謨猷應變備在司勳增邑八百戶通前合二千戶進
爵為沃陽縣開國公授南汾州諸軍事南汾州刺史十
四年增邑三百戶轉大都督其年授車騎大將軍儀同
三司加散騎常侍十六年授驃騎大將軍開府加侍中
尋授恒州諸軍事恒州刺史又遷雲州刺史昔軒丘分
族異姓者十四人鄴邑建侯宗盟者四十國太祖文帝
席卷闢河三分天下潁川從我並有鄉里之親新豐故
人非無布衣之舊更立九十九姓還存三十六國舊胄還

姓介綿增邑一千進爵為廣州城郡開國公尋授文州
諸軍事文州刺史國家以玉門西拒久勞亭障陽關北
牧多事風塵武成二年有詔進公都督瓜州諸軍事瓜
州刺史是以名馳梓嶺聲振榆關無雷畏威負霜懷惠
保定三年還朝授工部中大夫尋遷軍司馬夏官司武待
白露而治兵冬官考工紀玄雲而授職四年增邑三百
戶通前合三千九百戶其年授使持節大將軍都督治
左八軍總管軍事洛食朝登上將暮會小卒事涉交接

觀釁而返天和四年以本官領小司寇三度有星名天
獄八卦有坎象刑書公繁不秋荼嚴無夏日民知約法
未肯以獄吏為尊吏識刑名無敢以死灰相懼又任左
廂第三軍總管仍被救將兵馬北道教習韓信入關即
申軍令陳農受詔仍校兵書豈直六郡良家五營騎士
懸知正正之旗遙識亭亭之氣蒙犯霜靄旗鼓驅馳俄
而邁疾疹至大漸五年六月十六日薨于賀葛城春秋
六十有八將軍死綏三軍行哭都護喪還緣邊追祭九

月二十三日靈柩至於京師皇帝臨喪百寮赴弔詔遣使持節車騎大將軍儀同三司賀拔軌監護喪事又遣使持節車騎大將軍儀同三司紇豆陵亮冊贈使持節柱國大將軍同華宜數丹五州諸軍事同州刺史謚曰恭公其年十一月五日葬于京城南高陽原高司里夫人赫連氏兗州刺史悅之女年十四適余綿氏冊拜魯城縣君遷濟陰郡君又遷廣城國夫人肅恭令淑儀範賢才四德有耀三星增輝三公夫人見於斯矣建德元

年十二月亡春秋五十有八二年正月歸於高司之塋
劉荊州之墓合葬於襄水之陽衛將軍之陵同穴于廬
山之下嗚呼哀哉世子岌使持節儀同大將軍領兵部
大夫純孝事親忠貞事國禮義自立聲名有焉銘曰

軒臺受氏若水降居西城仲膺北陸寘餘山川雄烈風
俗扶疎昔我關塞沿襲干戈時遭拔本世值橫波北封
代郡東據遼河地未平一天猶薦瘥我公重光繼文踵
武總牧三蕃兼治六輔雅俗觀風都亭待雨不逢問吏

無閭桴鼓公以載世挺此令聞孝有三德忠惟一君馬
陵釋患聊城解紛兵防滿月戰避迎雲長松都尉細柳
將軍旣收淮海且蕃恒代高壁負關長亭穿塞疊鼓司
盟吏不能欺兵無敢背玉關遺矩汾海留愛大將受冊
公昇其壇六卿咸事公貳其官夷陵燒楚上黨分韓營
軍叅合校戰皋蘭年深厲起福過災生上台裂岳次將
星傾赤虵悲淚白虎哀鳴懸弓靈幕繫馬寒垆烟凝不
動泉凍無聲天子愴然追于贈謚禮官賜冊陪陵受地

印綬曰策衣衾曰祔玄窆就列黃腸在位自此何世從
斯幾春樹為櫟社陵成谷神詎知雲閣名在功臣

二年
本傳

作四
年

周車騎大將軍賀婁公神道碑

昔者軒丘命氏初分兄弟之姓若水降居始建諸侯之
國自是以官為族因地為宗水派枝分其可知矣公諱
慈字元達本姓張清河東武城人也仕於周張仲為孝
友謀於晉張彥為賢臣韓有開地則五世強國趙有孟

談則三卿不戰祖慶少習邊將憑仗智勇雖復五車竹
簡不取博士之名一卷兵書即以將軍自許角端在手
必無齊魯之侵蓮花挿腰甚得蛟龍之氣為車騎大將
軍儀同三司散騎常侍霸城縣開國伯贈河州刺史父璨
公子公孫有鎡基子天下良弓良冶有世業于家風書
則百家可知劒則千人可敵三槐以鼎鼎象物知其神
姦五等以桓珪班原空瑞守其宮室君以才望兼而有之
終於使持節車騎大將軍儀同三司散騎常侍武定縣

開國公贈河州刺史惟公稟山岳之靈受星辰之氣年在
髫髮甫就勝衣竹馬來迎已知名于郭伋羊車在道即
見賞于王澄豈直童子明經書生說卦而已至于禪河
清論秋水高談故以辨析龜林聲馳鹿野國家官族君
為首姓起家車騎大將軍儀同三司襲爵為公邑合一
千六百戶弱冠登朝傳呼甚寵漢魏台鼎故無此比中
朝方伯罕有其年大冢宰任總機衡是勤王略惜君忠壯
委以爪牙鎮左廂親信出乃領梁州防主華陽西極漢水

東流巴濮既寧沉黎即靜保定四年王師北伐以君驍
勇被召將兵師下宜陽身登函谷將燒白馬之城以覆
烏巢之壘既而中途甚雨未獲圍原軍師聞喪不成侵
宋柱國趙王今上之第九弟也文則河間上書武則任
城置陣作鎮岷丘揚鈴錦水白虎之俗難安黃龍之盟
不定以君智畧入佐中權天和元年授使持節大都督
治柱國摠府司錄仍轉司馬餘官封如故相如西喻鏤
石于靈山武侯南征浮船于瀘水方之今日彼獨何人

九品課工為上之下四年入朝歸事宰旅即授載師大夫將命齊國尋盟出境即用和隣之儀入國聞喪仍從會葬之禮可使南面此之謂乎尋以本官入治軍正至如渭水兵書在心為志軒丘陣法聚石成圖既得師不疲勞兵無怨讟入陪中禁更領儀同邸客城池門闌戶籍咸資巡警並用司存帝城近臣公室密戚如逢司隸似畏都官既而孤城鄭嫗不相其年巴水深翁不醫其疾春秋三十有三奄捐官舍吕子明之疾甚歎軫吳王阮元

瑜之長逝悲深魏主有詔贈某官禮也以建德四年三月日歸葬於河州苑川郡之禁山公六郡良家西河鼎族地壯金行人雄塞氣兵書七卷河水浮來射法三篇天弧夜下鋒旗不息刁斗恒驚猶得馬上讀書軍中習禮太史子義善於謀策諸葛公休長於撫馭四代儀同三司七世河州刺史鍾鼎成列冠蓋連陰謂生為貴臣死為貴神者也但以遊魂久客反葬途遠道阻山長妻孤子幼哀聲滿野愁氣連雲况復松檟飄飄方臨武威

之戍丘陵迴遠直對臨洮之城馬援亡於武溪尸柩返
於魏里梁鴻死於會計妻子歸於平陵嗚呼哀哉嶇崎
遠矣昔者繁昌祠前即有黃金之碣德陽基下猶傳青
石之碑是謂勒功乃為銘曰

七葉佐漢五世相韓忠臣入祀孝友當官青城仙洞黃
石祠壇臺堪走馬書足迴鸞武定風飈霜城嚴肅並馳
雙傳俱分兩竹重世刺舉連鑣袞服草靡青丘風馳赤
谷世不乏賢挺茲上嗣孝有三德忠無二志劒足身挺

書堪面試旂節既秉高蟬且珥龜傳印函蛇盤綬笥左
右將軍前後常侍繼踵五侯因循三事旂旃九坂艫舳
雙流還驅木馬更引金牛江波錦落火井星浮樽酒望
帝安歌蜀侯受服河陽偏師洛浦置陣成臯連旗廣武
朝兵減竈夜營多鼓箭起六廩鋒摧九虎倏忽人世俄
然今古崇發兩星醫驚二豎遊魂通夢言返舊塋紫泥
賜冊黃腸贈行途登石紐路入金城寒關樹直秋塞雲
平劍埋合柱書藏鑿楹武侯為廟樂公為社雲蓋低臨

霓裳紛下碑枕金龜松橫石馬永矣身世留名華夏

周上柱國宿國公河州都督普屯威神道碑

公諱威字某河南洛陽人也舊姓辛隴西人基若水之源纂商丘之胄邑于大毫實定其居封于小辛乃成其姓是以三川被髮辛有得見事之機八卦占爻辛廖有知人之鑒佐治以東都上將魏帝解衣武賢以西國功臣漢王推轂祖大汗武川太守考生河州四面總管大都督隴右貴臣河西鼎族公侯踵武岳牧連鑣並得聲

振長榆名雄高柳公秉靈山岳誕載星辰結髮嶷然齟
年成德澄波萬頃建標千仞鋒穎既高光芒已遠青衿
學劒既為人主所稱童子論兵即在中軍之策永熙元
年入仕蒙授直盭都督太祖文皇帝雪舊君之恥連西
伯之功始裂鴻溝初登函谷公擢衣沐髮仗劒轅門撤
洗足而相迎下賓階而顧問自此即居帳內仍為直寢
授寧遠將軍羽林監白土縣開國伯邑五百戶大統元
年從迎大駕進爵為侯增邑三百戶加冠軍將軍散騎

常侍轉大都督公善于用兵長于撫御自攻洛陽定弘
農戰河橋平沙苑冒刃衝鋒前無橫陣況以弦木六鈎
函犀七屬門多懸胄箭必中鞍山積器械谷量牛馬軍
吏計功司勲賞策授使持節銀青光祿大夫進爵為公
增邑八百戶昔者受律赤符韓信當乎千里治兵白帝張
飛擬於萬人比跡今日公之謂也五年授持節使都督
揚州諸軍事揚州刺史浮于江海達于淮泗篠簜既敷
瑤琨即序十三年授車騎大將軍儀同三司尋遷驃騎

大將軍開府仍賜姓普屯即為官族入陪武帳出摠戎
韜置府於陽關張旃於瀚海故得上書於漢即用同宗
爭長於周還無異姓十六年授鄜州諸軍事鄜州刺史
公頻領兩牧風政神明虎去西河梟移東郡河湄瑞氣
特表廉平廊祀神光徧明正直及乎魏終天祿周受惟
新明命已遷彝倫或革周元年改授大將軍枹罕郡開
國公增邑一千戶軍中受詔非論北伐之功大將登壇
無待東歸之策置陣太平開陰晉之道連兵廣武納榮

陽之城校戰丹山移營白壁莫不勇冠三軍名凌五將
保定四年授寧州摠管掌其北門既為鄭國所委捍其
西鄙無懼秦亭之逼是以築平綱之城衛人拱手戍榮
波之澤梁氏寒心朝廷與公有內外之親令公從戚里
之貴乃以魏文帝女為公夫人遂得長門之左別開公
主之園濯龍之傍便有王姬之館五年被徵入京拜少
司馬期於司武以公為魏絳佐於中軍以公為荀首豈
直謂之鶉火稱之縉雲而已哉其年被使領兵出西涼

州奉迎突厥皇后紀裂

原空

繻來卿為君逆稱族而行尊

君命也天和元年授柱國拜大司寇楚之柱國方之南
火軒之司寇譬以西雲摠授於公能官人也建德二年
授少傅四年授河州摠管都督七州諸軍事即為河州
大中正公之桑梓本於此地再為連率頻仍衣錦襄城
龍種更反池臺桂陽仙人還歸鄉里故老親賓酣歌相
慶安車駟馬天下榮之宣政元年授上柱國更加少傅
配于上相即陪玄扈之圖居于京師實有杞橋之策改

封宿國公食邑并前五千五百戶射鴻舊圃舞鶴餘城
既浮酸棗之河聊對淇園之竹來朝建章則天子降席
出遊戚里則郡公下階是以行滿天地名聞四海方當
光輔五軍叅謀七政天厲弗戒薨于所居春秋六十有
九柳莊告殯傾社稷之臣鄭僑云亡得諸侯之禮詔贈
某官謚某公禮也以今開皇元年七月某日反葬于河
州金城郡之苑川鄉山行隴底地入塞原望積石以緣
河臨崆峒而下坂玄甲黃腸崎嶇亭鄣及云莫徹方勞

榆沈若夫樹反壤也封夏屋焉終須潁川之碑乃見華
陰之碣世子儀同永達孝性有聞居喪得禮嗟海變而
田成懼山飛而地絕勒石墓田仍銘云爾

少典之孫玄王之子虹貫于月金承于水降及于周公
侯復始風俗氣候山川表裏河連積石山帶崆峒秦庭
北上漢使西通金行氣壯地勢人雄稜稜高節凜凜踈
風祖考藩屏濁河清渭兩地謨明雙流光賁水無別色
雲無異氣為吏為民惟懷惟畏公之嗣世實秉英靈降

神中嶽迴文列星鸞翔鳳顧珠角山庭臣深義本子極
天經洛城戰陣河橋旗鼓箭飲石梁劒燃銅樹並麗六
廩俱抽雙虎玉門開郡陽關置府再為上台兩為少傅
模範帝師經綸國步允襲峻德欽明審諭不吝車茵誰
言溫樹天道茫昧年齡倏忽上將星開功臣鼎沒九原
陵阜三河甲卒地險龜林營危馬窟西州永別北闕長
辭山張虛蓋野祭空帷陵原地迴松路風悲銘于碣石
勒以貞龜

周柱國楚國公岐州刺史慕容公神道碑

昔在殷書懋賞周禮議勲諸侯計功大夫稱伐惟師尚父昆吾載寶鼎之銘王命尸臣枸邑傳琯戈之賜故知太上立德明試以功存有顯爵之榮歿有大名之貴昊天不弔其惟楚國公乎可以旌德景鐘勒勲彝器式昭盛美載揚洪烈者焉公諱寧字永安昌黎徒河人也都尉總六縣之御名山稱五岳之佐燕太祖文皇帝慕容皝以當世英雄奄有河朔趙之南境且建王城冀之北

土仍為興國公既訖之苗裔家世燕陞高祖侍中使持節都督中外諸軍事太保錄尚書北地王慕容超之世藩屏王室詳之燕錄可得稱焉曾祖尚書府君因魏室之難改姓豆盧仍為官族祖仕魏文成皇帝考早亡朝廷以庸勲攸屬恩深追遠保定三年有詔贈柱國將軍少師涪陵郡開國公食邑二千戶公稟氣中和降祥川岳岐嶷表羈貫之年通禮稱綺紉之歲夙著奇節幼表大成兄弟分果備知推讓賓客解鈴曾無慙色永安元

年太宰元天無穆魏室三疑輔握兵淮右抗權江南公

時任別將便從征伐自是長城峽石必光行陣秦南隴

西每當矢石權疑降乘勝莫不前驅策勲行賞常居第

一永熙元年補子都督并加鼓節軍儀除桑乾太守轉

補都督其年以魏皇西幸奉迎大駕賜封河陽縣開國

伯增邑三百戶俄遷大中大夫改伯為侯增邑合九百

戶仍授使持節都督顯州諸軍事顯州刺史四年遷鎮

東將軍金紫光祿大夫其年秋河橋之後先登破陣遷

為車騎大將軍儀同三司五年沙苑之功加封合前二千戶俄授敷州刺史加散騎常侍外深推轂內侍集書十五年授右衛將軍十六年授大將軍後魏元年重授敷州刺史公以先經刺舉固辭不就三年改封武陽郡開國公除尚書僕射職惟贊奏任居封掌分左右之傳兼典舉之選屬以江南阻兵渚宮邊敵軍機警急鋒鏑縱橫公奉命星言元戎啟路摠秦人之銳士兼荆戶之廣卒水龍競雙刀之勢步奇陳四分之威夷陵既燒黔

中方定旋軍反旆解甲休兵其後鳳州內叛成都外絕
公又總督衆軍蒐乘即道兵不血刃並皆擒獲遷其酋
豪納其降附皇朝受終文祖革命神宗選賢與能改絃
創制爰降冊書授公柱國增邑四千戶二年授同州刺
史衿帶關輔唇齒秦晉編戶殷積邸閣儲峙藩籬是任
親賢勿居公建旗作牧褰帷行部六條斯舉百城咸勸
三年授公大司寇又以公勲庸特著冊封楚國公食邑
一萬戶蓋因破侯方仁等于荆陝即其地而封焉逖糾

王慝弛張刑政式遏寇虐於是御之以寬猛柔遠能邇
然後平之以冲和舜任臯陶不仁者遠晉舉隨會羣盜
皆奔保定四年授岐州諸軍事岐州刺史沉痼彌留保
定五年三月四日薨于私第春秋六十有二詔贈某官
謚某公禮也十月庚申葬于洪瀆之川馳綍毀宗客車
專道玄甲被屬國之兵介士陳輕車之騎克善令終生
榮死感嗚呼哀哉公經德秉哲體道居貞履貴思冲居盈
念損澄波千頃不能變其清濁高墻百仞無以測其汙

隆立身行已居安如墜亡躬殉義視險若夷至於將略
應變出奇設伏太一風角之占常從星辰之候樓船戰
陣之錄強弩馳射之書莫不動會機神發符雷電梯衝
所向地靡百樓之城長戟所臨野闢三門之陣是以斬
將搴旗四十三戰尊官厚祿三十七年武彰七德之義
誦誦九功之業迹紀庸器之文行昭易名之典昔臧文
既歿穆叔稱其立言鄭僑云亡宣尼泣其遺愛德陽青
石之墓千年未平板江白虎之碑百代無毀敢因斯義

乃作銘曰

遼水之東冀州之北既曰都尉兼稱屬國歛氣餘勇雄
邊遺則孝實天經忠為令德冠冤世祿羽儀祚脣俗被
燕丹風慚英蘭劬勞役行辛苦行陣勇過溺駿氣踰瓦
震王國克生思皇多士溫溫恭人謙謙君子擁旄仗節
出藩入仕五朝建旗千里時逢改特疑名載策勲淮陰
召拜昭陽破軍職司刑政獄慎深文沈羊不飲荏盜無
聞巴庸薄伐江漢專征軍摠六校兵兼七營運長擊短

後實先聲增壘威敵滅竈潛兵鐘鳴夜漏晞露朝陽邑
里蕭索宅帷荒涼豐碑下柩題湊遷喪宮臨櫬里臺傾
孟嘗卜兆屆期遠辰告筮德遺身後名昭沒世館舍長
捐泉扃永閉晏嬰悼齊柳莊悲衛風秋北原日沒川逝
墓田舊頃客土新封淚墮片石劍挂孤松清徽令範千
載餘蹤

周兗州刺史廣饒公宇文公神道碑

唐朝以元凱並進十有六人周室以昭穆先封十有五

國發源纂胃葉派枝分開國成家珠聯璧合是用克明
峻德思皇多士盛德有後公其裕哉公諱常字子元豫
州滎陽人也周宣中興然後樹賢建威鄭武有國然後
保姓受氏荆衡之賦千乘莫敢加兵號會之封十城翻
為獻邑况復郊門致騎先迎內史之賓南宮旦朝獨識
尚書之履祖思慶建威將軍山陽太守建威取曹仁之
號可以定名山陽有王暢之賢足觀風俗考頊銀青金
紫方於溫羨傳祗鎮南征東比於劉弘荀顗報功之冊

則槐路是儀贈行之典則荆河惟牧公弱齡早慧幼志
夙成立必正方言無剿說青衿智勇即埋雲夢之蛇童
子仁心已愛中牟之雉始遊庠塾不無儒者之榮或見
兵書遂有風雲之志出忠入孝事盡于心修身立名理
窮于性大統三年起義華陽先登廣武浮潛逾汜入渭
亂河蒙授永安縣開國男輔國將軍自爾長從太祖入
為帳內都督河橋接戰秋水則三月不流洛城揮鋒金
墉則一月路斷西京不賓羗戎侵軼城如飛鳥地有伏

龍公以金僕裁抽靈鉦暫舉蜂目已奔狼心遂革遷平東將軍帥都督十五年襲父封魏昌縣開國伯傳大都督魏後三年授使持節車騎大將軍儀同三司黃權受詔嘉其入魏之功竇憲當官賞其平戎之策公之此授勲庸著矣進爵廣饒縣開國公邑五百戶保定三年授都督羅州諸軍事羅州刺史仍領金州兵馬應接上庸公於文谷路溪澗崢嶸巖崖豁險山窮水斷馬束橋飛中埽既開雙城即款往者申息盡掩江黃無援涪陽極浦

亟犯風塵夏首西浮頻遭鋒鏑公以伏波受脤樓船誓
衆入橫江之陣進下瀨之兵越客文身湛盧終去吳人
長鬣鯨鯢遂遠建德四年授使持節開府儀同大將軍
公孫敖下光祿之塞諸葛誕勒九都之山公之處焉差
無慙德四方雜俗天下殊風以君廉能使為觀察馳傳
擁節揚旂持斧既乘驄馬仍被繡衣羣盜累足貴戚歛
手鄉亭留宿幸無歸忌之疑公車奏事寧有反支之日
是使陽球司隸無所申威鮑恢都官因人成事高祖武

皇帝以仲春誓衆甲子濟河公仗劔六軍披圖八陣譬
彼張遼前鋒而報魏主方之耿弇先戰而待蕭王及乎
九州道同四隩既宅遂得功叅勇爵名入司勳授上開
府增邑五百戶加以舉功行賞推恩分邑兼乘而反光
乎譙郡之城載寶而歸照于臨漳之水即日賜姓宇文
與國同族婁敬上書于鹿輅項伯舞劔于鴻門公之此
榮足為連類以公績著屯險誠貫風霜其年授使持節
都督東徐州諸軍軍事徐州刺史宣政元年授都督南兗

州諸軍事南兗州刺史作牧濟河風行于雷澤建旗海
岱化被于淮沂襜帷入境貪殘者解印冕旒從政仁義
者郊迎豈直白石開渠青鹽換粟祥雲入境行雨隨軒
而已哉在任遘疾薨于方鎮皇甫嵩監御斯牧賢能刺
史荀中郎連率此則中興方伯英聲茂實公之有焉詔
贈某官謚某公禮也以大象二年十一月十日歸葬于
滎陽之某山舊基九原悽愴趙文子其何言駟馬悲鳴
滕成公其已遠若夫勒鼎刊碑銘功頌德陳其令範必

在生前嗟乎此之樹碑異乎洙泗之水此之勒石異乎
燕然之山嗚呼哀哉乃為銘曰

高陽之子少典之孫蒼林遠邁若水遙源公侯復始鍾
鼎逾繁承基纂胄建國開藩我壯我武既公既侯緇衣
出鄭卿士歸周魚陵北上滎澤東流河移酸棗雨粟陳
留祖守南邦考鎮東部兩龜為印雙蛇結綬日察陰陽
星占長柳是曰世載其名不朽事親之道孝以立身事
君之道忠以立仁今君嗣德一此君親如松之茂如竹

之筠功叅荆棘職立兵戈北臨青嶺南通白波直雲橫
塞長星度河陳開沙斷師移竈多舉功行賞封疆受位
宮室鏤珪山河分地決勝千里謀深計秘建武功成名
連星次建旗濟深擁節龜蒙既蠶桑土實撫梧桐野無
異氣河無別風吳亭楚障莫敢彎弓倏忽身世俄然松
檟路轉銅魚山迴石馬武侯之廟樂公之社望此高碑
淒然淚下

周隴右總管長史贈太子少保豆盧公神道碑

本傳及碑中
止云贈少保

君諱永思字某昌黎徒何人本姓慕容燕文明帝旣之後也朝鮮微子之封孤竹伯夷之國漢有四城秦為一
候其先保姓受氏初在柳城之功開國承家始靜遼陽
之亂自天市星妖連津兵覆尚書府君改姓豆盧策仕
于魏祖代左右將軍魏文皇帝直寢父長少以雄略知
名不幸早世周朝以公兄弟佐命義存追遠保定二年
有詔贈柱國大將軍涪陵郡公是知春雨潤木自葉流

根西伯行仁推存及歿公以山岳精靈星辰秀異氣倖
鐘鼎聲感風雲觀於秦兵尚稱童子對於楚戰猶在青
衿太祖文皇帝乘時撥亂奄有霸業潁州從我舊愛無
渝春陵故人相知惟眷普泰二年闕西建義授殄寇將
軍奉迎大駕賜封新興縣伯邑五百戶開新安之鄉還
移楊僕之闕解弘農之圍更入劉昆之郡援桴併轡並
預前驅大統三年有沙苑之戰四年河橋之役介冑蟻
蝨戎馬生郊公應變愈長風颭更勇隱若敵國差強人

意授龍驤將軍中散大夫八年授直寢右親信都督尋
轉大都督加通直散騎常侍十六年授使持節車騎大
將軍儀同三司魏元年授驃驃大將軍開府儀同三司
鄧騭以漢朝親戚始授中台黃權以魏國功臣初登上
將公頻煩寵授朝野為榮三年都督成州諸軍事成州
刺史尋加侍中外摠連帥振威百城內叅常伯榮高八
舍于時隴坻黠羌時穿上谷榆中羣賊或聚漁陽公卷
甲星馳長驅千騎迴洛兗徒望風草靡瓜州豪傑束手

歸軍後魏元年改封龍支縣侯三年朝廷使大將安政
公隨突厥吐蕃渾歸國河郡二州屬當路首公領騎八
千以為戎防南通丹粟西望白蘭關塞無虞公之勲也
周元年授都督鄯州諸軍事鄯州刺史其年改封沃野
縣公增邑千戶二年授隴右總管府長史武成元年都
督利涉汶三州諸軍事利州刺史五年兵破文州陽陣
蠻仍平瀘水以保定元年將兵破巴州恒犍獠度瀘五
月葛亮有深入之兵長坂九迴王遵有忠臣之路霜電

不驚水草無乏天幸將軍斯之謂矣其年授司會八法
斯掌九賦是均事總歲成功參日要三年還授隴右摠
管府長史公屢弼英蕃頻相大府北海入朝仰以對問
東平謁帝因而定禮遂使馬首懷燕不無樂毅蕃臣擬
漢或多田叔兄楚國公以叅和挹讓莊贊樂推建國開
都奄荒南服求以先封武陽郡三千戶益公沃野之封
朝廷有兄弟相讓不無前史推恩分邑有詔許焉增邑
并前合四千七百戶既而六氣相犯五聲相觸靈壽不

終遊魂且變薨於官舍春秋五十八詔贈少保幽冀定
相等五州諸軍事幽州刺史謚曰敬公禮也天和元年
二月六日葬于咸陽洪瀆川大夫墓樹以柏諸侯墳高
于雉嗚呼哀哉公資忠履孝蘊義懷仁直幹百尋澄波
千頃留心職事愛玩圖籍官曹案牘未嘗煩委戎馬交
馳不妨餘裕兄弟公侯國朝宗戚宜春有湯沐之盛濯
龍無流水之譏渭南千畝之竹尚懼盈滿咸陽二頃之
田常思止足立身則十世可宥遺子則一經而已刺史

賈逵之碑既生金粟將軍衛青之墓方留石麟乃為銘
曰

朝鮮建國孤竹為君地稱高柳山名密雲遼陽趙裂武
遂秦分寶珪世胄雕戈舊勲名稱賓賓言謂身文挺此
含章降茲岐嶷有犯無隱王道正直唯愛唯敬永成悅
色枕籍禮闡留連學殖策叅帷帳功披荆棘韓陣揮戈
齊城憑軾豹策乃建龍韜同啟校戰岐陽申威隴坻城
壘畫地山林聚米上馬諭書臨戎習禮賈復開營廉公

屈體從容傳會占對造請用此廉平終茲寬猛綠林兵
息潢池盜靜名振赤山威高青嶺玄獸浮河飛螟出境
災氛生蠙毒水侵涇朝傾地鎮夜落台星石壇承祀豐
碑頌靈渭城高柏昌陵下亭須知地市為讀山盟

潁州一作


潁昌應變一作靈變三年周書作二年龍支支作廬突
厥下有天子二字舊作谷七百作五百五十八作四十
八元作六委作擁咸作池

溫湯碑

咸池浴日先應綠甲之圖砥柱浮天始受玄夷之命仁

則滌蕩埃氛義則激揚清濁勇則負山餘力弱則鴻毛
不勝仲春則榆莢同流三月則桃花共下其色變者流
為五雲之漿其味美者結為三危之露烟青于銅浦色
白于鈆溪非神鼎而長沸異龍池而獨涌灑胃滯腸興
羸起瘠秦皇餘石仍為鴈齒之階漢武舊陶即用魚鱗
之瓦山間涌水實表忠誠室內江流彌彰純孝豈若醴
泉消疾聞乎建武之朝神水蠲痼在乎咸康之世嵩岳
三仙之館不孤擅于天池華陰百丈之泉豈獨高于蓮

井



後周文紀卷六